

## Jahresbericht 2015/2016

Mi sächst Jahresbricht wetti mou chli anders gstaute u nid nume a s'letschte Jahr däiche, sondern mi a mini Höhepunkte mitem Verein und mine Vorstandsfroue erinnere.

Äs isch sehr viu gschaffet worde i dene Jahr - mir hei üsi Statute nacheme Kursbsuech bim VBL ersteut und dr Versammlig zur Genähmigung vorgleit.

Gli druf heimer i Zämearbeit mit Vereins- und ehemalige Vorstandsmitglieder und Presidäntinne äs Leitbild ersteut und igfüert. Üses Leitbild isch top aktuell u macht mir persönlich viu Fröid - äs isch ussagechräftig und farblich und gstauteerisch sehr asprächend!

Und de isch mit viu Arbeit und Härzbluet üsi Homepage entstange und isch beschtens betreut dür d'Jolande. Ä akutelli Homepage isch hüt und i Zuekunft äs wichtigs Instrumänt, dr Verein s'repräsentiere.

Üse Verein het äs paar tolli Aläss mitgstautet - sigs miter Landi oder mit angere Vereine fürs Schwingfescht und sMusigfescht zum Bispü.

Und üsi Catering si scho bekannt und mir wärde sicher wider agfrot. Dr erscht Aläss ufem Hof vo Aeschlimaas, wo mir für die schwizerischi akademischi Gseuschaft für Umweltforschung und Ökologie d'Verpflegig für d'Exkursionsteilnähmer im Smaragdgebiet hei chönne parat steue. Und d'Situation mitem Waffle bache, wo üs dr Strohmetz het gfäut im Moosbärg....dank äm Thomas und dr Ursula heimer aui Stromqueue azapfet, wo mir hei gfunge ☺

Üse Wafflestang ar 800-Johrfyr, wo mir dank isigem Isatz von euch Vereinsmitglieder trotz schlächtem Wätter hei chönne chli Umsatz erziele u presänt si für d'Bsuecher.

Und ou dr Wafflestand mit Kaffeestube am Biodiversitätsanlass im Mai 2015 - ou bi unbeständigem Wätter hei mir rächte Umsatz chönne generiere.

Ä Rieserfolg heimer mitem Catering füre Personalanlass der Firma Geiser Agrocom AG chönne verzeichne. Miteme Apéro us Gmüesdips, Melonespiess, Speckzüpfle und bsungrige Brote u mit Landfrouebowle heimer die Gniesser scho überzügt gha. Ds Menu

mit surem Mocke, verschidene Händöpfustock und Salat hei für rissende Absatz gsorget. Üsi Waffle mit verschidene Arome und Glace si bueschstäblich verschlunge worde. Aues i Auem ä super Erfolg und ä tolle Zuestupf id Vereinskasse.

Und ize steit üs gli die kantonali Delegierteversammlig bevor, wo mir die Delegierte und d'Gäscht tüe verpflege - ig fröie mi sehr dodruf und bi überzügt, dass ou das ä tolle Erfolg wird si. Mi hei ize scho viu gschaffet derfür und mit öier Ungerstützig wird das ä super Anlass. Mir si vo viune Site scho finanziell ungerstützt worde, so dass mir dä Aläss mit ä cli Gewinn wärde chönne abschliesse.

Au die Johr hei mir im Vorstand ä super Zämearbeit chönne pflege - ig bi fescht ungerstützt worde und ha immer öpper gha, wo mi het verträte, wens het müesse si. Ig bi näbscht mim Arbeitspensum und mine angere Ufgabe immer froh gsi, wenn mini Vorstandsfroue ou mou hei ä Delegierteversammlig bsuecht. So bi ig froh, hani die DV vom OLV witgehend chönne delegiere und für a DV vom Kanton oder a Präsidentinnekonferenz hani immer sofort öpper gfunge, wo mit mir isch mitcho. As si jewils tolli Versammlige und dr Ustusch mite angere Vereine und Präsidentinne isch wärtvou.

Ganz bsungers Fröid hani immer, wenn üsi Aläss möglichscht guet bsuecht si und mir d'Bestätigung überchöme, dass üses Programm doch aktuell und intressant isch. Mir hei im Vorstand oder mit Vereinsmitglieder schon Stunde dermit verbracht, usezfinge, was äch d'Mitglieder wünsche und wo sie äch gärn chöme.

Üsi Reise, die Letschte Johr zäme mitem Froueverein, si gäng guet bsuecht und so heimer ou dr Car guet gfüllt. Üsi Usflüg im Verein und üsi Degustationen si gäng ä Hit. Und nachdäm mir jo ou Kafi degustiere und nid nume Schnaps, het üse Ruef nid Schade gnoh ;-)

Mir verbinge Gnuss mit zäme si, Lehre und Entdecke mit Gselligkeit, und s'eifach guet ha mitenang. Ig bi froh, wenn mir ou i Zuekunft Alt und Jung chöi verbinge und wenn mir Jüngere für die Eutere chöi do si und umgekehrt. Mir mache d'Geburtstagsbsuech ou immer Fröid und d'Wärtschetzig vo dene Froue isch unbezaubar.

Üsi Märte si gar nüm wäg s'dänke u si feschte Bestandteil i üsem Programm worde. Mir mache näbscht de Kontakte miter Bevölkerig ou immer meh Umsatz. Mit dene Inahme chöi mir de

Mitglieder öppis zrüg gäh oder äbe ä wiukommeni Spänd mache.

Indäm mir ou gäng wider Kontakt pflüge mit Ching und Jugendliche, si mir ou i ihrne Chöpf presänt und üses Si und Schaffe isch nid unbekannt.

Mi Letscht Jahresbricht ändet mitem Dank a öich aui - danke für öies Mitmache, fürs Mitträge und Mitdänke. Ig wünsche öich für d'Zuekunft witerhin äs tolls Vereinsgscheh u mire Nachfolgerin viu Gföits, viu Muet und Ungerstützig vo aune Site.

Ig fröie mi ufs Mitmache im Verein aus Mitglied und fröie mi ou über die nöi gwunneni Freizit. Mite beschte Wüensch ä öich aui und beschtem Dank für öies Vertroue.

Aarwangen, 8. März 2016

Susanne Rentsch